



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK



Vogošća, ul. Jošanička br. 80, tel: 00387 33 586-411

P R A V I L N I K
O STIPENDIRANJU SPORTISTA SA PODRUČJA OPĆINE VOGOŠĆA

Vogošća, april 2025. godine

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09), člana 48. stav (3) Zakona o sportu Kantona Sarajevo – prečišćeni tekst („Službene novine Kantona Sarajevo“ br: 45/12 i 36/21) i čl. 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) i član 1. Odluke o načinu primjene Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik donosi

PRAVILNIK O STIPENDIRANJU SPORTISTA SA PODRUČJA OPĆINE VOGOŠĆA

I OSNOVNE ODREDBE

Član 1. (Predmet Pravilnika)

Ovim Pravilnikom uređuju se osnove, način i kriteriji stipendiranja nadarenih sportista koji postižu vrhunske rezultate na domaćim i međunarodnim takmičenjima, a imaju prebivalište na području općine Vogošća.

Član 2. (Cilj Pravilnika)

Cilj Pravilnika je podsticanje sportskog razvoja, vrhunskih rezultata i promocije sporta kao važnog segmenta društvenog razvoja.

Član 3. (Rodno značenje izraza)

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

II USLOVI I KRITERIJI

Član 4. (Uslovi za stipendiranje)

Pravo na dodjelu sredstva iz člana 1. ovog Pravilnika mogu ostvariti pojedinci koji ispunjavaju sljedeće uslove:

- a) da su državljani Bosne i Hercegovine;
- b) da imaju prebivalište na područje općine Vogošća najmanje godinu dana do dana podnošenja zahtjeva;
- c) da su starosne dobi od 9 do navršenih 20 godina života;
- d) da su aktivni članovi sportskog kluba;
- e) da su ostvarili neke od sportskih rezultata, a u skladu sa odredbama iz člana 5. ovog Pravilnika.

Član 5. (Kriteriji za dodjele sredstava)

- (1) Utvrđivanje rang liste kandidata za dodjelu stipendija vrši se na osnovu ostvarenih sportskih rezultata u pojedinačnoj i ekipnoj konkurenciji na državnim prvenstvima i međunarodnim takmičenjima priznatim od svjetskih i evropskih federacija, a vrednuju se rezultati ostvareni u prošloj kalendarskoj godini, i to:
- učešće na Olimpijadi mladih, Svjetskom i Evropskom prvenstvu,
 - osvojeno 1., 2. i 3. mjesto na svjetskim prvenstvima i kupovima, evropskim prvenstvima i

kupovima, Balkanskom prvenstvu, Mediteranskim igrama, osvojeno 1., 2., 3. mjesto na međunarodnom takmičenju sa učešćem minimalno 12 zemalja, a isti se nalazi u kalendaru takmičenja svjetske ili evropske federacije.

– osvojeno 1., 2. i 3 mjesto na državnom prvenstvu.

- (2) Vrednovanje rezultata vršit će se na osnovu potvrde o ostvarenom rezultatu u prethodnoj godini, koju izdaje zvanični strukovni sportski savez kod kojeg je kandidat registrovan za takmičenje.
- (3) Rezultati se vrednuju prema sljedećoj BODOVNOJ TABLICI:

Naziv sportskog takmičenja	POJEDINAČNA TAKMIČENJA				EKIPNA TAKMIČENJA			
	I mjesto	II mjesto	III mjesto	učešće	I mjesto	II mjesto	III mjesto	učešće
Olimpijada mladih	10	9	8	10	10	9	8	10
Svjetsko prvenstvo i Svjetski kup	9	8	7	6	9	8	7	6
Evropsko prvenstvo i Evropski kup	8	7	6	4	8	7	6	4
Balkansko prvenstvo	7	6	5	-	7	6	5	-
Mediteranske igre	6	5	4	-	6	5	4	-
Međunarodna takmičenja	5	4	3	-	5	4	3	-
Državno prvenstvo	4	3	2	-	4	3	2	-

- (4) Vrednovanje rezultata vrši se tako što se boduje najbolji aktuelni rezultat takmičara.
- (5) Ukoliko je takmičar postigao više rezultata na jednom takmičenju bodovat će se samo jedan najbolji rezultat.
- (6) Ukoliko dva kandidata imaju isti broj bodova nakon bodovanja najboljeg aktuelnog rezultata rangiranje se vrši na osnovu drugog postignutog rezultata, sve dok se ne utvrdi razlika u bodovima.

III POSTUPAK DODJELE, NAČIN I IZNOS SREDSTAVA

Član 6. (Javni konkurs)

- (1) Sredstva za stipendiranje sportista dodjeljuju se putem javnog konkursa i podnesenih prijava po istom.
- (2) Javni konkurs se objavljuje na web stranici Općine, i ostaje otvoren 20 dana od dana objavljivanja.
- (3) Zahtjevi se dostavljaju službi nadležnoj za sport (u daljem tekstu: Služba) putem protokola Općine i putem pošte.

Član 7. (Potrebna dokumentacija)

- (1) Na javni konkurs kandidat je, uz prijavi obrazac, dužan priložiti sljedeće dokumente:
- izjavu da ne prima sportsku stipendiju po drugom osnovu (za maloljetne kandidate izjavu potpisuje roditelj/stratelj) ovjerenu od općinskog organa uprave,
 - Uvjerjenje o kretanju za sportistu,
 - potvrda kluba o aktivnom članstvu,
 - potvrdu zvaničnog strukovnog sportskog saveza (kantonalni, federalni, državni savezi ili olimpijski komitet) o postignutim sportskim rezultatima podnosioca prijave za prošlu kalendarsku godinu, kako na domaćim tako i na međunarodnim takmičenjima.

- e) Dokaz da međunarodno takmičenje okuplja minimalno 12 zemalja i da se nalazi u kalendaru svjetske ili evropske federacije.
- (2) Dokumenti se prilažu u originalu ili ovjerenoj kopiji.

Član 8. (Postupak obrade prijava)

- (1) Pristigle prijave svih kandidata obrađuje Služba i na osnovu obrađenog materijala donosi i objavljuje preliminarnu rang listu sportskih stipendista.
- (2) Preliminarna rang lista objavljuje se na oglasnoj ploči i web stranici Općine Vogošća.
- (3) Na listu iz stava (1) ovog člana kandidati mogu u roku od osam dana od dana objavljivanja iste, podnijeti pismeni prigovor Komisiji.
- (4) Komisiju iz stava (3) ovog člana imenuje Općinski načelnik iz reda državnih službenika.
- (5) Odluku o prigovoru, Komisija će donijeti u istom roku, računajući od dana njegovog podnošenja.
- (6) Konačnu odluku o izboru kandidata za dodjelu sportske stipendije donosi Općinski načelnik.
- (7) Svaki prijavljeni kandidat na konkurs pismeno se obavještava o rezultatima konkursa u roku od 15 dana od dana donošenja konačne odluke.

Član 9. (Visina stipendije)

- (1) Stipendije se dodjeljuju za jednu kalendarsku godinu i isplaćuju se za deset (10) mjeseci.
- (2) Visina stipendije na mjesečnom nivou iznosi 100,00 KM, odnosno 1.000,00 KM na godišnjem nivou po kandidatu.
- (3) Za takmičare iz jedne sportske discipline može biti dodijeljeno najviše 10% sredstava namijenjenih za sportske stipendije.
- (4) Ako se iz određenih razloga ne prijavi dovoljan broj kandidata koji ispunjavaju uslove u okviru jedne vrste sporta, nadležna Služba zadržava pravo da uz saglasnost Načelnika navedena sredstva preusmjeri na ostale kandidate kako bi se planirana sredstva iskoristila.
- (5) Broj korisnika se utvrđuje u skladu sa raspoloživim sredstvima u Budžetu Općine Vogošća.

IV PRAVA I OBAVEZE KORISNIKA I DAVAOCA STIPENDIJE

Član 10. (Obaveza sklapanja ugovora)

- (1) Sa izabranim kandidatom zaključuje se ugovor o dodjeli sportske stipendije kojim se regulišu međusobna prava i obaveze korisnika stipendije i Općine.
- (2) Ugovor potpisuje Općinski načelnik i korisnik sredstava ili roditelj/staratelj korisnika stipendije.

Član 11. (Gubitak prava na stipendiju)

- (1) Sportista gubi pravo na stipendiju ukoliko:
 - a) napusti redovno školovanje;
 - b) se utvrdi da prima stipendiju po istom osnovu;
 - c) promijeni mjesto prebivališta,
 - d) prestane aktivno učestvovati u trenažnim i takmičarskim procesima.
- (2) Korisnik stipendije dužan je obavijestiti Službu u roku od 8 dana od dana nastanka promjena predviđenih u stavu (1) ovog člana, u suprotnom će biti u obavezi izvršiti povrat iznosa dodijeljenog po osnovu ovog Pravilnika, a najkasnije do kraja tekuće godine u kojoj je primio stipendiju.

V PRELAZNE I ZAVRŠNE ODREDBE

Član 12. (Usklađivanje prava ranije ostvarenih po prethodnom pravilniku)

Korisnici koji su pravo ostvarili po odredbama pravilnika koji je bio na snazi prije stupanja na snagu ovog Pravilnika, mogu ostvariti pravo na isplatu razlike sredstava do iznosa utvrđenog ovim Pravilnikom, pod uslovom da podnesu zahtjev u skladu sa odredbama ovog Pravilnika.
Pri obračunu iznosa uzima se u obzir iznos sredstava koji je korisniku već isplaćen na osnovu ranije donesenog Ugovora.

Član 13. (Prestanak važenja)

Stupanjem na snagu ovog Pravilnika prestaje da važi Pravilnik o stipendiranju učenika i studenata sportista sa područja općine Vogošća, broj: 03-36-1803/22 od 02.11.2022. godine.

Član 14. (Stupanje na snagu)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

**OPĆINSKI NAČELNIK
Migdad Hasanović**

Broj: 03-36-603/25
Vogošća, 24.04.2025. godine

Obrazloženje

I Pravni osnov

Pravni osnov za donošenje ovog Pravilnika je:

- član 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09)
- 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) kojim je određena nadležnost Općinskog načelnika za donošenje pojedinačnih i općih akata iz samoupravnog djelokruga općine.
- član 1. Odluke o načinu primjene Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine definisana je obaveza primjena Smjernica od strane lokalnih zajednica u skladu sa specifičnostima i nadležnostima.

II Razlozi donošenja

Donošenje Pravilnika o dodjeli sportskih stipendija ima za cilj uspostavljanje jasnih, transparentnih i pravednih kriterija za prepoznavanje i podršku sportista koji ostvaruju značajne rezultate, predstavljaju lokalnu zajednicu na domaćim i međunarodnim takmičenjima, te svojim uspjesima doprinose promociji sporta i zdravih stilova života među mladima.

Ovim Pravilnikom uređuju se uslovi, kriteriji, postupak i način dodjele sportskih stipendija sportistima, s posebnim fokusom na afirmaciju mladih talenata, poticanje kontinuiteta u sportskom razvoju i olakšavanje uslova za treniranje i takmičenje. Pravilnikom se definišu jasni uslovi koje korisnici moraju ispuniti, uključujući sportske rezultate, pripadnost sportskim klubovima, uzrasne kategorije, kao i obaveze stipendista tokom trajanja stipendije. Također, predviđena je procedura prijave i odlučivanja koja omogućava efikasnu i nepristrasnu raspodjelu sredstava.

Imajući u vidu dosadašnju praksu i potrebu za normativnim uređenjem ove oblasti, donošenje ovog pravilnika predstavlja logičan i neophodan korak u cilju stvaranja sistemske podrške sportistima i unapređenja sportskog ambijenta u lokalnoj zajednici.

III Obrazloženje predloženih rješenja

- Član 1. definiše predmet regulisanja Pravilnika;
- Član 2. definiše cilj programa;
- Član 3. utvrđuje rodno značenje izraza;
- Član 4. propisuje uslove za ostvarivanje prava.
- Član 5. propisuje kriterije za dodjelu sredstva;
- Član 6. definiše obavezu raspisivanja javnog poziva;
- Član 7. propisuje potrebnu dokumentaciju;
- Član 8. definiše postupak obrade prijava;
- Član 9. utvrđuje iznos stipendije;
- Član 10. propisuje obavezu sklapanja ugovora;
- Član 11. propisuje mogućnosti za gubitak prava na stipendiju;
- Član 12. reguliše pitanje usklađivanja ranije ostvarenih prava;
- Član 13. utvrđuje prestanak važenja;
- Član 14. – definiše stupanje na snagu.

III Finansijska sredstva

Sredstva za sportske stipendije obezbijedit će se u Budžetu Općine Vogošća.